

այնպես չէր ձեռնարկել այդ գործը, մանավանդ որ՝ այդ ժամանակ արդեն ուներ «հրատարակչական աշխատանքի շուրջ յոթ տարվա փորձ ու հմտություն»<sup>17</sup>, իսկ Դավրիժեցու պատմագիրքը Ոսկանի հրատարակած թվով տասնյոթերորդ գիրքն էր<sup>18</sup>: Նա, անկասկած, տեղյակ էր այն հետաքրքրության մասին, որ տաճվում էր Դավրիժեցու աշխատության հանդեպ և գիտեր, որ հրատարակում է 17-րդ դարի պատմագրության ամենամնայուն արժեքը:

Այնուհետև Առաքել Դավրիժեցու և նրա «Գիրք պատմութեանց» աշխատության մասին գնահատանքի ու արժևորման խոսքեր, վկայակոչումներ ու հղումներ հանդիպում ենք նրան հաջորդած պատմագիրների ու ժամանակագիրների երկերում: «Չկա Դավրիժեցու «Պատմությունից» հետո հայ պատմագրության մեջ հանդես եկած շատ թե քիչ խոշոր որևէ երկ, որտեղ XVII դ. առաջին կեսի պատմական իրողությունների նկարագրման համար լայնորեն օգտագործված չլինեն Դավրիժեցու հաղորդած տեղեկությունները»<sup>19</sup>, – գրում է Լորեստա Դանեղյանը:

Այդ երկերում միևնույն ժամանակ սկսում է իր դրսևորումներն արձանագրել նաև Դավրիժեցու պատմագրքի գործառնականությունը, և սկսում է գործել նաև նրա «օգտակար գործողության գործակիցը», հասկացություն, որը Ջավեն Ավետիսյանի կարծիքով՝ «մշակութային հուշարձանի գնահատման, արժեքավորման նոր չափանիշ ու մոտեցում է»<sup>20</sup>, որի պարագային կարևորվում է այն, թե ինչ չափով և ինչ կերպ են հաջորդող ժամանակներում օգտվել տվյալ մշակութային հուշարձանից: Առաջիններից մեկը

---

<sup>17</sup> **Քրաչիկ Սիրզոյան**, Առաքել Դավրիժեցու Պատմության առաջին հրատարակության մասին, «Բանբեր Երևանի համալսարանի», 1971, թիվ 2, էջ 190:

<sup>18</sup> Տե՛ս **Ռաֆայել Իշխանյան**, Հայ գրքի պատմություն, հատոր 1, Երևան, 1977, էջ 530:

<sup>19</sup> **Լորեստա Դանեղյան**, Առաքել Դավրիժեցու երկը որպես Սեֆյան Իրանի XVII դարի պատմության սկզբնաղբյուր, էջ 34-35:

<sup>20</sup> **Ջավեն Ավետիսյան**, Խորենացին մշակույթի գիտակցության մեջ, էջ 3: